



GNIESSER

FASNACHT 2026



AAGRIFF US DR LUFT

Kääfer, Wäschpi, Mugge, Wanze
glaini und au groossi Brätscher,
mir lyyde und die Vyycher danze
doo hilft ys au kai Muggedätscher.
D Inseggte hänn jetzt d Wält im Griff
die Grott muess d Menschhait woorlig schlugge,
per Fluugi, Päggli oder Schiff
findet d Mugge jeedi Lugge.
Us Aasie kunnt schyynts d Invasioon
bestoot nid nummen us Inseggte,
au d Massetouri-Divisioon
bringt iibli Vyyre im Versteegte.
Im Gaarte kasch es nümme gniesse
dangg Japankääfer gits kai Wyy,
au Bletter, Bliete, Frücht mien biesse
die gueten Äärnte sin verbyy.
Die Diigermugge gryffen aa
wie d Staffle vo dr Patrouille Suisse,
doo nutzt kai Doggter FMH
jetz hämmer s volle Vyyre-Gschyss!
Dernoo d Hornisse ganz beflisse
die rotte d Biinevölger us,
esoo wie d Herrscher, fyys und grisse
wo wiete wie im Irrehuus.
Ebola und Denguefieber
Zika und Malaria,
e Biinestich wäär mir doo lieber
mit Kaffi Crème no nääbedraa.

Globaal verbraite sich die Schwäärm
doo nutzt kai Muur, kai Zollschikaane,
kai Yyfuerstopp, kai Gift, kai Läärm
und au kai wyssi Friidensfaane.
Jetz hämmer doo e Mugge-Putsch
geege haimischi Inseggte,
d Deschpoote makes glyych – und futsch!
S wird haimlig abgmuurggst im Versteegte.
Uff die Tyranne sotte d Mugge
iir Zyyl usrichte und se stäche,
diräggt in s Hiirni, waich, voll Lugge
zum stoppe Eeländ und Verbräche.
Be-stäche wird au braggtiziert
mit Rolex, Gold und Düüfelspaggt,
wo daas für d Länder aanefiert
das lääse mir im Stundetaggt.
Uff em Kontinänt dort ääne
läbt au soonen Ego-Bachel,
duet sich als z wyt uuselääne
und setzt ins Flaisch sy MAGA-Stachel.

Dr Muggegrieg im Laabor züchtet
e Mikrochip im Kopf blatziert,
mit KI gstüürt, uff d Menschhait grichtet -
utopisch oder scho codiert?
Hybryydi Aagriff noch und nöcher
no schlimmer als d Inseggtegfoor,
sin d Drohne mit den Yschusslöcher
s isch laider alles ächt und woor.

Daas alles hämmer scho im Kopf
nur wird's halt als ganz fescht verdrängt,
so wie bim Frosch im haisse Dopf
wo s Uusegumpe nümmi längt.

Die Basler Bänggli sin dr Rysser
au s Dschungel-Globusdach mit Wald,
für Diigermugge, Schnooggebysser
e Bruetstett s het in jeedem Spalt.
Au s Hauptboscht-Rooftop ganz in Eere
e Paradyys für Mugge, Lyys,
die hooche Heerre mien sich weere
jä, Luxus het halt au sy Bryys.

E Stich ins Oor und ain in Zingge
d Libbe schwillt, es bysst und pocht,
dy Laarve quätscht, kasch nümmi dringge
und d Fasnachtsseel die schreit und kocht.

Bisch aakoo im Delyyrium
so saages uns die Groosminischer,
nimmsch halt e Schlugg Steryylum
oder dringgsch dr ganz Kanischer.

Die ainzig Hailig, maint dr Naar,
und daas ganz ooni Honoraar,
isch d Impfig jetz im Februaar,
mit Fasnachtsvyyre, sunneglaar!
D Frau Fasnacht maint no dooderzue:
«Zem wiirgglig alli Vyyre z kille
streu y drei Dääg us myyner Drue
e Medizyn mit Röppli-Bille».

D Ladäärne-Uusstellig uff em Münschterblatz goot vom Määntig znacht bis am Mitwuch demoorge